

NO. SOALAN: 103

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 16 MEI 2016 [ISNIN]

SOALAN : 103

Tuan Charles Anthony Santiago minta **PERDANA MENTERI** menyatakan kesediaan Kerajaan termasuk kesedaran rakyat mengenai faedah pembinaan dua loji nuklear di Malaysia. Berapakah jumlah program kesedaran yang telah dianjurkan sehingga bulan April 2016.

**JAWAPAN: (Oleh YB Datuk Seri Mah Siew Keong,
Menteri di Jabatan Perdana Menteri)**

Tuan Yang Dipertua,

Untuk Rancangan Malaysia Kesebelas (RMK11), tumpuan utama adalah kepada komunikasi awam mengenai keperluan dan perbekalan tenaga negara, termasuk tenaga nuklear dan sumber-sumber lain.

Aktiviti komunikasi awam ini adalah berdasarkan kepada kajian pendapat umum dan Pelan Komunikasi Komprehensif mengenai tenaga nuklear yang telah disediakan dari tahun 2015 hingga 2016.

Kajian pendapat umum tersebut adalah secara kuantitatif dan kualitatif. Kajian kuantitatif melibatkan seramai dua ribu empat ratus (2,400) responden di seluruh negara dan kajian kualitatif pula melibatkan temubual mendalam dengan dua belas (12) pemimpin pendapat, atau dengan izin, *opinion leaders*, dan perbincangan kumpulan berfokus, atau dengan izin, *focus group discussions*, dengan lapan (8) kumpulan rakyat yang mencerminkan campuran penduduk di beberapa bandar dan kawasan luar bandar terpilih di seluruh negara.

Pada tahun 2015, satu forum umum mengenai tenaga nuklear telah juga diadakan oleh, dengan izin, *Malaysia Nuclear Power Corporation* (MNPC), di Kuala Lumpur. Forum ini didapati lebih menarik perhatian kumpulan profesional dan pertubuhan-pertubuhan bukan Kerajaan, atau dengan izin, *non-governmental organisations* (NGOs), daripada masyarakat umum.

Oleh itu, MNPC turut memberikan penerangan atau pembentangan mengenai tenaga nuklear di forum atau persidangan yang dianjurkan oleh pihak-pihak lain di Malaysia, terutamanya untuk sektor industri, pertubuhan profesional seperti Institut Jurutera Malaysia, dan pelajar institusi-institusi pengajian tinggi tempatan.

Dari tahun 2015 hingga April 2016, MNPC telah terlibat memberikan penerangan atau pembentangan seperti ini dalam dua puluh (20) forum, persidangan atau seminar yang dianjurkan oleh pihak lain.

MNPC juga memberikan penerangan kepada media massa tempatan, seperti yang telah diterbitkan oleh media berkenaan, selain menerima kunjungan pihak-pihak berkepentingan untuk berbincang mengenai tenaga nuklear.

Dalam konteks ini, Kerajaan akan mengambil masa yang diperlukan untuk meneliti tenaga nuklear secara bertanggungjawab. Proses ini dibuat kerana pihak Kerajaan hendak memastikan supaya keputusan yang dibuat nanti adalah keputusan terbaik dan bertanggungjawab.

Sekian, terima kasih.